

Ina prestaziun extraordinaria

Mariana Brändle ha terminau culla nota 6

DA HANS HUONDER/FMR

■ **L'emprendista sco emploiada specialisada da sanadad da Puntreis a Mustér, Mariana Brändle, ha contonschiu la nota maximala per la fin da siu temps da scolaziun. Quei ei ina prestaziun extrordinaria.** Ils examens finals dallas emprendistas e dils emprendists ein curdai uonn muort la situaziun excepziunala cul coronavirus.

Per la nota finala han las prestaziuns duront igl emprendissadi quintau sco era in giudicament davart la pratica entras il responabel per l'instrucziun.

Nota 6

Ella casa da tgira Puntreis a Mustér han duas emprendistas sco emploiadas specialisadas da sanadad terminau lur temps da scolaziun ed ina da quellas schizun culla nota maximala. *Maria Brändle* ch'ei oriunda dil cantun S. Gagl e ch'habitescha dapi plirs onns a Mustér ha contonschiu la nota 6. Quei grond success ei staus pusseivels suletamein cun notas praticamein maximalas duront tut ils treis onns digl emprendissadi. Malgrad quei eis ella sezza era stada surstada da quella nota, mo ha secapescha acceptau ella cun grond pla-

scher. Medemamein cun ina buna nota ha *Petra Flepp* da Mustér terminau igl emprendissadi, numnadamein cun 5,3.

Ella ha fatg igl emprendissadi en fuorma d'ina scolaziun supplementara ch'ha cuzzau dus onns. Tier ella ha in discurs davart ils fatgs professiunals era quintau per la nota finala.

Cooperaziun cun autras casas

La casa da tgira Puntreis a Mustér scolescha regularmein emprendistas ed emprendists sil sector dalla cumpetenzza dalla sanadad. Era il proxim onn gaudan quater dels quell'instrucziun. Sco quei ch'il meinacasa *Diego Deplazes* di succeda la scolaziun dad ina vart el Center da formaziun per sanadad e socialesser a Cuera, da l'autra vart cun in accumpignament practic en casa. Leutier vegnan regularmein dis da scolaziun tematics, denter auter era ensem cullas casas da tgira s. Martin a Trun e Da Casa Val Lumnezia a Vella.

Ils fretgs dalla buna scolaziun han aschia era saviu vegnir raccoltai uonn. «Nus essan ferg loschs dil grond success da nossas duas emprendistas», puntuescha il meinacasa *Djego Deplazes* enviers la FMR.



Il meinacasa *Diego Deplazes*, *Petra Flepp*, il responsabel per la scolaziun *Daniel Prediscan* e *Mariana Brändle* ch'ha contonschiu la nota 6 (da sen.).

FOTO HANS HUONDER